



## **Lu Terzu Millenniu**

**A stu puntu di la storia tirrestri / senza cchiù Cristu né ideologia  
cadì lu muru ma anchi la cruci / nmanu arristammu a l'ipocrisia  
li nsignamienti di li nostri vecchi / vannu cadiennu comu li pira  
curriemmu sulu pi fari cchiù grana / di la matina sinu alla sira.**

**Nzina la Cina ca avia a purtari / a la vittoria lu comunismu  
lassaru Mau miezzu la merda / e abbrazzaru lu consumismu  
terzu millenniu cu li so "liggi"/ cangià macari la razza umana  
fimmini cu l'uecchi a miennula / viestinu ora Dunci e Gabbana.**

**Li nosci figli fannu di tuttu / chianginu, gridanu, fannu casinu  
si nun ci accatti lestu curriennu / l'urtimu tipu di telefoninu  
li signuri si anchi c'è callu / cu la pilliccia sunnu cchiù beddri  
nchiesa preganu Diu / e lu sangu d'armali ci scula a li spaddri.**

**Chista è l'epica di la produzioni / lu granni saccheggiu di la terra natìa  
mentri ancora in tri quarti di munnu / li ricchi mangianu e lu scarsu talìa  
dall'Africa all'Asia si soffri la fami / picchè nun c'è nenti di chi mangiari  
sta glubalizzazioni ca tutti cantammu / ci porta sustanza o li farà muriri?**

**Vuliemmu la machina grossa / pi farini abbidiri e fari pumata  
lamintannuni ca pi fari lu pienu / di sordi ni voli na carrittata  
l'arsoliu finì, prepararari putiemmu / sia li citaleni ca li cannili  
comu na lumìa la terra è sprimuta / picchè l'omu è di razza vili.**

**Caniattì Aprili 2006**

**Indice poesie: <http://www.solfano.it/treppiedi/index.html>**

**Pagina principale: <http://www.solfano.it>**